

# Lotto Glück

Am Sunntigombds klopfts.  
Scha ertönts: "Ummer rei!"  
Zaghafft tritt gleich drauf  
a Mütterla ei:

"Gutn Ombd!... Ach verzeiht!"  
söggt däs Fräälä nervös,  
"ich hob bluoß ä Bitt -  
gäll, ihr seid mer net büös!"

Ich hör doch suo schwäär  
un ka nümmer rächt gsäh -  
ihr habt doch ä Radio,  
änn Fernsäher äh.

Drüm bitt ich euch,  
doch an suon Kastn zä genn  
un zuzuhörn, wos heit  
die Lottozohn senn."

Sie kramt aus ihrn Täschlä  
drei Lottoschein raus:  
"Do nämmt un vergleicht sä -  
ich kenn mich net aus!"...

Där Maa such sein Bleischtift,  
ä Schtücklä Papier,  
ka gleich drauf vam Lotto  
die sechs Zohn notier,

vergleicht die drei Zettl,  
grinst: "Hob mersch gedacht:  
zu mehr als een Richtgn  
habt ihrsch net gebracht!"

Do nickt die Alt fröhlich  
un söggt: "Lieber Gott,  
ich dank der, weil du mit mer  
Eisäähn host ghoot!"...

Klar: öllä senn schprachluos:  
Die Alt muß doch schpinn!  
Där Mää lacht: "Ihr schpielt  
un wöllt gar nex gewinn?"

Dös Mütterla glücklich:  
"Ihr müßt mich versochtihr -  
die Schein senn mein Buumä  
un net öbber mir.

Wenn drauf ä Gewinn wär,  
könnt ich wos erlääm:  
Ich hob doch vergässn,  
die Schein oozägääm!!!"

H. Hildenstein

ä = Mümdat-a!